



ZARAUZKO UDALA

EUSKARA IKASTAROAK EGITEKO DIRULAGUNTZAK EMATEKO OINARRI ESPEZIFIKOAK

1. Helburua
2. Onuradunak
3. Eskaerak
4. Laguntzak emateko prozedura
5. Izapidea eta ebazpena
6. Zuzkidura eta aurrekontuko partida
7. Onuradunaren betebeharrak
8. Diruz lagun daitezkeen ikastaroak
9. Bete beharreko baldintzak
10. Dirulaguntzak esleitzeko eta neurtzeko irizpideak
11. Aurkeztu beharreko agiriak
12. Bateragarritasuna
13. Dirulaguntzak ordaintzea
14. Dirulaguntzaren xedea justifikatzea
15. Publizitatea
16. Dirulaguntzak itzultzea
17. Dirua itzultzera behartuak
18. Araudi osagarria
19. Errekurtsoak

1.- HELBURUA

Oinarri hauen xedea ondorengoa da: ikasturtean zehar helduentzako euskalduntze eta alfabetatze ikastaroak egiten dituzten zarauztar orori dirulaguntzak emateko baldintzak arautzea. Era berean, Udako UEUko ikastaroak egin dituzten herritarrei ere matrikula gastuetarako dirulaguntza emango zaie. Eta hori guztia Zarauzko Udalaren dirulaguntzak arautzen dituen ordenantzak ezartzen duena kontuan izanik.

2.- ONURADUNAK

1. Dirulaguntza hauen onuradun izaera izango du dirulaguntzaren oinarri den jarduera egin behar duen pertsona fisiko edo juridikoak, edota dirulaguntza jasotzeko zilegi egiten duen egoeran dagoenak. Pertsona horrek, gainera, dirulaguntza lerro bakoitzerako dagokion eranskinak ezartzen dituen baldintza zehatzak bete beharko ditu.

2. Oinarri hauetan arautzen diren dirulaguntzen onuradun ezin izango dira azaroaren 17ko Dirulaguntzen 38/2003 Lege Orokorrak, 13.2 artikuluan aurreikusten den egoeraren batean diren pertsona edo erakundeak.

3. Onuradunak izateko debekua:

Oinarri hauetan araututako dirulaguntzak ezingo ditu jaso ondorengo zirkunstantziaren batean dagoenak:

- 38/2003 Legeak, azaroaren 17koak, dirulaguntzenak, 13.2 artikuluan zerrendatutako edozein.
- 26/2015 Lege Organikoak, uztailaren 28koak, ezarritakoari jarraikiz, sexu-delituengatik administrazio-, lan- edo zigor-arloko zehapenak jaso dituzten pertsona fisiko nahiz juridikoei.
- Emakume eta Gizonen Benetako Berdintasunari buruzko martxoaren 22ko 3/2007 Lege Organikoan eta Emakume eta Gizonen Berdintasunerako 4/2005 Legean ezarritako betekizunak betetzen ez dituzten pertsona fisiko nahiz juridikoei.
- Emakume eta gizonen arteko berdintasunaren printzipioaren aurkako helburuak, sarbide-sistemak, funtzionamendua, ibilbidea, jarduera, antolaketa edo estatutuak dituzten, eta sexuaren, ideologiaren, jaioterriaren, nazionalitatearen edo sexu-joeraren ziozko diskriminazioa egiten duten pertsona fisiko nahiz juridikoei (Emakumeen eta Gizonen Berdintasunerako Zarauzko Udal Ordenantzaren 38.artikulua).
- Berdintasunerako eta sexuagatik diskriminatuta ez izateko eskubidea urratzeagatik administrazio-, lan- edo zigor-arloko zehapenak jaso dituzten pertsona fisiko nahiz juridikoei (Emakumeen eta Gizonen Berdintasunerako Zarauzko Udal Ordenantzaren 38. artikulua).

3.- ESKAERAK

1. Dirulaguntzak emateko prozedura ofizioz hasiko da, Gipuzkoako ALDIZKARI OFIZIALEAN argitaratutako urteko deialdiaren bitartez.
2. Eskaerak Udaletxeko Erregistro Orokorrean aurkeztu behar dira, dirulaguntza hauen urteko deialdian xedatzen den epearen barruan:
 - Udaletxea (HAZ - Herritarren Arreta Departamentua)
 - Udal zerbitzu telematikoak.

Eskaerak agiri hauekin batera aurkeztuko dira:

- a) Eskaera orri ofiziala, behar bezala beterik; orria jaso daiteke Zarauzko Udalaren Erregistro Nagusian eta www.zarauz.eus webgunean.
- b) Dirulaguntza mota bakoitzaren berariazko oinarri erregulatzaileretan eskatzen diren agiriak, eranskin bakoitzaren arabera.
- c) NANaren kopia.
- d) Zerga betebeharrak eta Gizarte Segurantzarekikoak egunean dituela egiaztatzen duten agiriak. Horren gainean, 2.3 oinarrian xedatutakoaren arabera, interesatuek adierazpen bat izenpetu dezakete, berariazko baimena emanez ziurtagiri horiek egin behar dituzten entitateek behar diren datuak Zarauzko Udalaren esku utz ditzaten.
- e) Eskatzaileak onuradun izateko ezintasun egoerarik ez duela adierazten duen lekukotasuna, ziurtagiria edo, hala badagokio, aitorpena, 2.2 oinarrian xedatutakoaren arabera.

3.- Eskatzen diren agirietakoren bat Zarauzko Udalaren esku baldin badago, dirulaguntzaren eskatzaileak erabil dezake urriaren 13ko 39/2015 Legeak, Administrazio Publikoen Administrazio Prozedura Erkidearenak, 28.3 artikuluan xedatzen duena, baina agiriak zein egun, organo edo bulegotan jaso edo egin ziren adierazi beharko du, betiere dokumentu horiek loturik diren prozedura bukatu eta bost urte baino gehiago igaro ez bada.

4.- Eskaera orria edo harekin batera aurkeztu beharreko agiriak akatsez edo osatu gabe baldin badaude, interesdunari errekerimendua egingo zaio hamar eguneko epean falta zuzentzeko edo aurkeztu ez dituen nahitaezko dokumentuak eramateko, eta adieraziko zaio, hala egin ezean, eskaera atzera egindakotzat joko dela, urriaren 13ko 39/2015 Legeak Administrazio Publikoen Administrazio Prozedura Erkidearenak, 68.1 artikuluan xedatzen duenaren arabera.

4.- LAGUNTZAK EMATEKO PROZEDURA

Laguntza hauek elkarrekiko lehiakortasun jardunbideaz emango dira, eta emateko prozedura Zarauzko Udaleko dirulaguntzen Ordenantza Orokorrean ezarritakoa izango da.

5.- IZAPIDEA ETA EBAZPENA

Izapidea eta ebazpena Zarauzko Udaleko Ordenantza Orokorrean ezarrita dagoenari jarraiki egingo dira.

Organo eskudunak

- Antolamendua eta instrukzioa (Instrukzio-organoa): Euskara Departamentuko arduraduna.
- Azterketa eta balioespena (Balioespen Batzordea): Kide anitzeko organo bat, dirulaguntza ematen duen Departamentuko informazio-batzordeko kideek osatutakoa.
- Ebazpena (Organo eskuduna): Alkatetzari edo Tokiko Gobernu Batzarrari egokituko zaio, Udalaren administrazio-antolamenduan une bakoitzean indarrean diren eskumenekin eta aldi bateko eskuordetzeekin bat etorriz.

Jakinarazpen-epea

Dirulaguntzen ebazpena jakinarazteko epea Zarauzko Udaleko Ordenantza Orokorrean ezarritakoa izango da.

6.- ZUZKIDURA ETA AURREKONTUKO PARTIDA

Dirulaguntzen zuzkidura eta aurrekontuko partidak Euskara Departamentuaren urteko deialdietan ezarriko dira.

Aurrekontuan izendatutako diru-kopurua nahikoa ez balitz dirulaguntza jasotzeko eskubidea duten eskabide guztiak betetzeko, banaketa proportzionala egingo da baldintzak betetzen dituzten eskabide guztien artean.

Bestalde, dirulaguntza lerro bakoitzerako zehaztutako diru-kopurua gehitu ere egin ahal izango da, Udal Aurrekontuaren Exekuzio Oinarriek aurreikusten dutenaren arabera.

Baimendutako gastua handitu edo murriztu ahal izango du aldaketaren zenbatekoaren arabera eskumena esleituta duen organoak, dirulaguntza ematea ebatzi baino lehen. Dena den, horrek ez du beste deialdi bat egitea ekarriko.

7.- ONURADUNAREN BETEBEHARRAK

Pertsona onuradunaren betebeharrak, eranskinetan jasotakoez gain, hauek dira:

- a. Euskara Departamentuaren aurrean dirulaguntza emateak eskatzen dituen baldintza eta betebeharrak betetzen dituela egiaztatzea.
- b. Organo emaileak egin beharreko egiaztapen-jardunak onartu eta lagundu, indarrean den araudiaren baldintzetan, eta baita kontrol-organoek egin ditzaketen finantzako beste egiaztapen- eta kontrol-jardunen mende ere, aurreko jardunetan eskatzen zaion informazio guztia ekarrita.
- c. Xede berberako jasotako dirulaguntzak organo emaileari jakinaraztea, halakorik jaso bada.
- d. Emakidarako ebazpen-proposamena egin aurretik zerga-betebeharrak, Gizarte Segurantzakoak eta Zarauzko Udalarenak egunean dituela egiaztatzea.

8.- DIRUZ LAGUN DAITEZKEEN IKASTAROAK

Honako ikastaroak lagunduko dira diruz:

- a) **Euskalduntze- eta alfabetatze-ikastaroak:** Aurrez aurrekoak, autoikaskuntzakoak nahiz barnetegiak.
- b) **UEUko udako euskarazko ikastaroak.**

9.- BETE BEHARREKO BALDINTZAK

Pertsona onuradunek honako baldintza hauek bete beharko dituzte:

- a. Euskalduntze- edo alfabetatze ikastaroren bat edo, UEUko udako euskarazko ikastaroren bat egin izatea.
- b. Dirulaguntzaren xede den ikastaroak irauten duen bitartean Zarauzko udalerrian erroldatuta egotea.

- c. Ikastaroan eskainitako orduen %80 hartzea gutxienez.

Hartutako orduen ehunekoa (%) kalkulatzeko, ikasleak ikastaroa noiz hasi duen hartuko da kontuan.

10.- DIRULAGUNTZAK ESLEITZEKO ETA NEURTZEKO IRIZPIDEAK

Eman beharreko dirulaguntzak kalkulatzeko, honako irizpideok hartuko dira kontuan:

a. Euskalduntze- eta alfabetatze ikastaroak:

- Ikastaroak irauten duen bitartean langabezia-txartela duen ikasleak: ordaindutako matrikularen %100 izango da bekaren zenbatekoa.
- Gainerakoak: ordaindutako matrikularen %75 izango da bekaren zenbatekoa.

Urteko, gehienez ere 500,00 €ko dirulaguntza jasoko du eskatzaile bakoitzak.

Barnetegien kasuan, gehienez ere 700,00 € jasoko ditu eskatzaileak ikasturteko. Eskola-matrikula bakarrik lagunduko da diruz; ez dira kontuan hartuko egoitza-gastuak eta jatordu-gastuak.

Gainera, Udalak dirulaguntzetan ordaindu beharreko kantitatea handiagoa bada aurrekontuan horretarako izendatutako kopurua baino, orduan, kasu horretan banaketa proportzionala egingo da eskatzaile guztien artean.

b. Udan egindako euskara ikastaroak eta UEUkoak

- Ikastaroak irauten duen bitartean langabezia-txartela duen ikasleak: ordaindutako matrikularen %75 izango da bekaren zenbatekoa.
- Gainerakoak: ikasleak ordaindutako matrikularen %50 izango da bekaren zenbatekoa.

Urteko, gehienez ere 500,00 €ko dirulaguntza jasoko du eskatzaile bakoitzak.

Gainera, Udalak dirulaguntzetan ordaindu beharreko kantitatea handiagoa bada aurrekontuan horretarako izendatutako kopurua baino, orduan, kasu horretan banaketa proportzionala egingo da eskatzaile guztien artean.

Eskatzaile bakoitzak ikastaro mota bat baino gehiagorako dirulaguntza eska dezake, baina urteko gehienez ere 500,00 € (700,00 € barnetegietarako) jaso ahal izango ditu.

11.- AURKEZTU BEHARREKO AGIRIAK

Eskaera inprimakiarekin (7.7.A Eranskina) batera, agiri hauek aurkeztu behar ditu eskatzaileak:

- a. Eskatzailearen NANaren fotokopia.

- b. Matrikularen ordainagiria.
- c. Euskaltegiaren edo UEUren agiria, eskatzailearen asistentzia (%tan), ikastaroaren ordu teorikoak eta ikasleak gainditutako urrats-kopurua, adieraziko dituen.
- d. Ikastaroa, Zarauzko euskaltegietatik kanpoko euskaltegiren batean egiten bada, hori horrela egitearen arrazoiak zeintzuk diren azaldu beharko da idatziz. Kanpoan egindako ikastaro berbera Zarautzen egiterik balego, ez da dirulaguntzarik emango.
- e. Langabeen kasuan, Lanbideren **“Izen ematearen aldiei buruzko txostena”** eta **“lan bizitzaren ziurtagiria”** (ikasturteak irauten duen bitartean LANBIDEn izena emanda egon beharko du eskatzaileak).
- f. Xede bererako eskatutako edo jasotako bestelako dirulaguntzei buruzko eta 2 artikulua d) puntuan zehazten den dirulaguntza publikoak jasotzeko debekurik ez izatearen inguruko zinpeko aitortpena. (7.7.B Eranskina).
- g. Zerga betebeharrak eta Gizarte Segurantzarekikoak egunean dituela egiaztatzen duen zinpeko aitortpena. (7.7.B Eranskina)
- h. Oinarri hauei erantsitako zinpeko aitortpena (7.7B Eranskina)

Zarauztarra izatearen baldintza Udalak berak egiaztatuko du Udal Erroldaren bidez.

Era berean, Zarauzko udal euskaltegiko ikastaroren baterako dirulaguntza eskaria egin dutenen kasuan, Udalak berak egiaztatuko du ikastaroan hartutako orduen ehuneko euskaltegiko datu-basearen bidez.

Nolanahi ere, eskatzaileei behar besteko informazio osagarria eskatu ahal izango zaie eskatutako dirulaguntza behar bezala baloratu ahal izateko.

12.- BATERAGARRITASUNA:

Emango den dirulaguntza bateragarria izango da xede berarekin jaso daitekeen beste edozeinekin, baldin eta gain-finantziatorik ez badago laguntzen den xedearen guztirako kostuan. Horrelakoetan dagozkion kenketak egingo dira, aldea ez ordainduz edo dagokion kopurua itzultzeko eskatuz.

Zarauzko Udalak eskubide izango du eskatzaile bakoitzak emandako edozein datu beste administrazio publikoekin eratzeko, beti ere deialdi honen xede den gaiari atxikita.

13.- DIRULAGUNTZAK ORDAINTZEA

Laguntzak ordaintzeko aurrez Euskara Departamentuaren aldeko txostena beharko da. Bertan egiaztatuko da laguntza emateko erabakian jarritako baldintzak bete direla.

Dirulaguntza ordainketa bakar batean emango da banku-transferentzia bidez, zuritu eta gero, behin dirulaguntza ematea erabaki eta gehenez ere bi hilabeteko epean.

14.- DIRULAGUNTZAREN XEDEA JUSTIFIKATZEA

Oinarri hauetako eranskin bakoitzean zehazten diren agirien bidez zurituko dira dirulaguntzak.

15.- PUBLIZITATEA

Emandako dirulaguntzen zerrenda Udalaren web orrian eta udaleko iragarki-oholean argitaratuko dira.

Era berean, emandako dirulaguntzen, onuradunen eta zenbatekoen zerrenda HABEra (Helduen Euskalduntze eta Berreuskalduntzerako Erakundea) bidaliko da, bertan duten euskara ikasten ari diren ikasleen datu basean dirulaguntza hauen berri jaso ahal izateko.

16.- DIRULAGUNTZAK ITZULTZEA

Oinarri hauetan edo dirulaguntza ematean ezarritako betebeharretakoren bat bete ezean, dirulaguntza berriro aztertuko da eta, horren arabera, Zarauzko Udalak dirulaguntza baliogabetu edo gutxitu ahal izango du eta baita itzultzeko eskatu ere, abenduaren 17ko 38/2003 Lege Orokorrak, Dirulaguntzei buruzkoak, 37. artikuluan eta 52. eta hurrengo artikuluetan aurreikusten duen baldintzetan.

1. Jasotako diru kopuruak itzuli beharko dira eta dirulaguntza ordaindu zenetik itzulketa egin beharra erabakitzen den bitarteko berandutza interesak ordaindu beharko dira azaroaren 17ko Dirulaguntzen 38/2003 Lege Orokorrak 37. artikuluan aurreikusitako kasuetan, eta bereziki hurrengo kasu hauetan:

- a. Dirulaguntza eskuratzea horretarako ezarrita dauden baldintzak faltsutuz edo eskuratze hori galaraziko luketen baldintzak ezkutatuz.
- b. Dirulaguntza emateko oinarrian dagoen helburua, jarduera, proiektua edo jokabidea osorik edo zati batean ez betetzea.
- c. Jasotako dirulaguntza zurrizko beharkizuna ez betetzea edo behar bezalako zurrizko ez aurkeztea, 10. eta 11. oinarrietan xedatutakoaren arabera eta, hala behar denetan, dirulaguntza mota bakoitzaren berariazko oinarri erregulatzailuetan.
- d. Dirulaguntza emateko ebazpenean xedatzen diren hedapen bitartekoak jartzeko beharkizuna ez betetzea.
- e. Indarrean diren legeetan aurreikusitako finantza egiaztatze eta kontroleko jardueri aurre egitea, aitzakiak jartzea edo uko egitea, baita kontabilitate, erregistro edo dokumentu gordetze aldetik diren beharkizunak ez betetzea ere, horrek eragiten duenean ezintasun bat dirulaguntzaren erabilera egiaztatze, helburua bete den jakiteko, diruz lagundutako jardueren benekotasuna eta erregulartasuna, edo beste herri administrazioek edota erakunde publiko nahiz pribatuek, estatukoek, Europar Batasunekoek edo nazioartekoek xede berarekin emandako laguntza, dirulaguntza, sarrera edo baliabiderik jaso ote den egiaztatze.
- f. Administrazioak onuradunei ezarritako beharkizunak ez betetzea, edota haiek, dirulaguntza ematerakoan, onartutako konpromisoak ez betetzea, dirulaguntza emateko oinarrian izan ziren helburuak betetzeko, proiektua gauzatzeko, jarduera egiteko edota jokabidea aintzat hartzeko moduari dagokionean edo eragiten dionean.

2. Emandako laguntzaren edo dirulaguntzaren zenbatekoa, bakarka edota bestelako administrazio publikoen edo erakunde publiko nahiz pribatu nazional edo nazioarteko dirulaguntza edota bestelako laguntzarekin batera, onuradunak aurrera eraman beharreko jardueraren kostua gainditzen duenean, emate ebazpena aldatu egingo da eta, beharrezkoa bada, itzuli egin beharko da garatutako jardueraren kostuz gaindiko diru kopurua.

Bi herri erakunderen edo gehiagoren dirulaguntza emanak direnean, eta paragrafo honetan aipatzen duen soberakina gertatzen denean, ebazpena aldatzea edo, beharrezkoa bada, dirua itzultzea gauzatuko da bakoitzak emandako kopuruaren arabera hainbanaketa eginda.

3. Itzuli beharreko zenbatekoak eskubide publikoko diru sarreratzat hartuko dira.

17.- DIRUA ITZULTZERA BEHARTUAK

1. Aurreko oinarrian azaldutako kasuetan, onuradunek jasotako diru kopurua osorik edo zati batean itzuli beharko dute, gehi diru kopuruoi dagozkien berandutza interesak. Beharkizun horrek ez du zer ikusirik, hartara iritsiz gero, ezar daitezkeen zigorrekin.

2. Dirua itzultzeko beharkizunaren erantzule izango dira subsidiarioki merkataritzako sozietateetako administratzaileak edota beste pertsona juridiko batzuen legezko ordezkariak dutenak, urratutako beharkizunak betetzeko beren ardurapeko beharrezko ekintzak egiten ez badituzte, ez betetzea gertagarri egiteko erabakiak hartzen badituzte edota beren mendekoenei leku ematen badiete.

3. Halaber, jardueri utzitako pertsona juridikoen lege ordezkariak dutenek, aplikagarri zaizkien xedapen legal edo estatutarioen arabera, haien itzulketa beharkizunaren erantzule izango dira subsidiarioki.

18.- ARAUDI OSAGARRIA

Oinarri berezi hauetan aurreikusi ez den orotan arau hauek aplikatuko dira: azaroaren 17ko Dirulaguntzen 38/2003 Lege Orokorra (azaroaren 18ko BOE); horren garapenerako Erregelamendua, uztailaren 21eko 887/2006 Errege Dekretuaren bidez onartua (uztailaren 25eko BOE); eta Zarauzko Udalak eta bere Erakunde Autonomoek dirulaguntzak emateko Ordenantza Orokor arautzailea.

19.- ERREKURTSOAK

Interesatuak erabaki honen aurka zuzenean administrazioarekiko auzi errekurtsua aurkez dezakete administrazioarekiko auzietako Donostiako epaitegietan, argitaratu eta biharamunetik hasita bi hilabeteko epean.

Hala ere, partikularrek aukera dute horren aurretik berraztertze hautazko errekurtsua aurkezteko oinarri hauek onartu dituen organo eskudunaren aurrean, argitaratu eta biharamunetik hasita hilabeteko epean. Hori eginez gero, ezingo da administrazioarekiko auzi errekurtsorik aurkeztu harik eta berraztertzearen berariazko ebazpena eman edo ustezko ezespina gertatu arte. Dena dela, egoki irizitako beste edozein errekurtsu aurkez daiteke.

DATUAK

Hasierako onespena	2019ko martxoaren 28an
Iragarkia GAOn	2019ko apirilaren 5en (66 zk.)
Alegazioak aurkezteko epea:	2019ko maiatzaren 23an
GAOn testua:	2019ko irailaren 6an (170 zk.)
Indarrean:	2019ko urriaren 1ean